

*LE CHAPITRE DE L'EXPLICATION, contenant cinquante-quatre versets, escrit à la Meque.*

*Lecteur, Gelaldin intitule ce Chapitre de l'adoration.*

**A**V nom de Dieu clement & misericordieux. L'Alcoran a esté enuoyé par le clement & misericordieux, il explique les mysteres diuins en langue Arabesque à ceux qui les sçauent comprendre, il annonce aux bons delices du Paradis, & presche aux meschants les tourmens de l'Enfer, neantmoins la plus grande partie du monde s'esloigne de la foy & n'escoute pas tes paroles; ils disent, Nous auons le cœur endurcy, nous ne pouuons pas comprendre ce que tu nous presche, nos oreilles sont bouchées, nous sommes trop esloignez de toy pour ouyr ce que tu dis, obserue ta loy, nous viurons à la nostre; Dis leur, ie suis homme comme vous, vostre Dieu est vn seul Dieu, soyez-luy obeissans, & luy demandez pardon de vos pechez, malheur est sur les infidelles qui ne payent pas les dixmes, & qui ne croyent pas au iour du Iugement, les fidelles qui feront de bonnes œuures iouïront d'vne recompense infinie: Dis leur,

*Le Lun-  
dy & le  
Mardy.  
Voy Ge-  
laldi.*

comme ferez-vous impies enuers celuy qui a creé la terre en deux iours ? comme pourrez-vous dire qu'il a vn compaignon égal à luy ? il est seul Seigneur de l'Vniuers ; il a esleué les montagnes, il a beny la terre, & a donné à chaque region ses particularités en quatre iours pour ceux qui en aurót besoin, apres ce il est môté au Ciel qui estoit semblable à la fumée, & à dit au Ciel & à la terre, vous m'obeirez par force ou par amour ; ils ont respondu, Seigneur, nous serons obeifsans à tes commandemens, il a creé sept Cieux en deux iours, & a ordonné de chaque Ciel à sa volonté, il les a ornez d'estoilles & les preserue de la malice du Diable, c'est vn effet de sa toute-Puissance, il est tout Puissant & sçait tout. Si les infidelles s'esloignent de la foy, dis-leur, ie vous ay menacé comme a cydeuant fait le tonnerre les gens d'Aad & de Temod, lorsque les Prophetes leur ont enseigné la loy des anciens vray-croyans, à sçauoir de n'adorer qu'un seul Dieu : ils ont dit, si Dieu eust voulu alterer nostre loy, il nous auroit enuoyé des Anges pour nous prescher, nous ne croirons pas en vostre mission. Le peuple d'Aad s'est enorgueilly en terre sans raison, & a dit, qui est plus-puissant que nous ? Ne consideroient-ils pas que celuy qui les a creéz est plus puissant & plus riche qu'eux ? neantmoins ils ont mesprisé nos commandemens, nous auons enuoyé contr'eux vn vent froid & impetueux en vn temps malheureux, qui leur a fait souffrir en terre la honte & l'ignominie à cause de leurs crimes, il leur fera sen-

*Le Ieudy  
& le Ve-  
dredy.  
Voy Ge-  
laldi.*

tir les peines de l'Enfer qui sont beaucoup plus grandes que celles de la terre, & seront eternellement privez de protection. Nous auôs enseigné le droit chemin aux gens de Temod, ils ont preferé l'aveuglement à la lumiere, & l'impieté à leur salut, ils ont esté surpris par le tónere, & ont souffert de grâdes peines à cause de leurs pechez; nous n'auons sauué personne d'entr'eux que les fideles qui auoient nostre crainte deuant les yeux. Souuiés toi du iour que les ennemis de Dieu serôt asséblez dedans l'Enfer, ils deffendrôt leur cause deuant leur Iuge iusques à ce qu'on aye tesmoigné contr'eux, leurs oreilles, leurs yeux & leur peau seront tesmoins de leurs pechez, ils leur diront, pourquoy tesmoignez-vous contre nous? ils respondront, celuy qui nous fait parler fait parler toute chose: c'est luy qui vous a crééz, & estes au iourd'huy assemblez deuant luy pour estre iugez. Vous ne vous estes pas bien cachez lorsque vous l'auiez offensé, vos oreilles, vos yeux, vostre peau, sont tesmoins contre vous, vous auez crû que Dieu ne verroit pas vos pechez, c'estoit vostre opinion, certainement il vous chastiera, & serez tous au nombre des gens perdus. Perseuere & patiente, le feu d'Enfer sera leur habitation, ils ne pourront pas complaire à Dieu dedans les flammes, nous leur auons donné pour compagnon les Diabes qui leur ont fait treuuer le peche agreable; la parole de Dieu s'accomplira contr'eux, comme elle a esté accomplie contre ceux qui les ont precedez tant des

hommes que des Demons qui sont condamnés. Les infidèles ont dit n'escoutez pas cét Alcoran, il est plein d'erreur, peut-estre que vous serez seduits: Le leur feray souffrir de rigoureuses peines, & les chastieray selon leurs demerites, telle est la recompense des ennemis de Dieu, ils demeureront éternellement dedans le feu d'Enfer, parce qu'ils mesprisent ses commandemens. Les impies diront au iour du Iugement, Seigneur fais nous voir les Diabes & les hommes qui nous ont deuoyez, nous les foulons aux pieds, & les precipiterons au fond de l'Enfer. Ceux qui auront professé la loy de Dieu, qui auront obey à ses commandemens seront visitez par les Anges, & seront ce iour exempts de crainte & d'affliction, ils leur diront, resiouissez-vous dans le Paradis qui vous est préparé, vous y trouuerrez tous les contentemens que vous souhaiterez, ils vous ont esté preparez par le clement & misericordieux. Il n'y a rien de meilleur que de prier Dieu, que de faire de bonnes œuures, & de professer son vnité, le bien & le mal ne sont pas semblables; chasse le mal avec tes bonnes œuures, il y a vne tres-grande hayne entre la foy & l'impieré, la foy est donnée à ceux qui perseverent à bien faire, & à ceux qui sont doüés de la grace de Dieu; le Diable te tentera, mais demande secours à Dieu, il entend tout & sçait tout, la nuit, le iour, le Soleil & la Lune sont signes de sa route-Puissance, n'adorez pas le Soleil ny la Lune, adorez Dieu qui les a créez; si les infidèles s'esleuent contre la foy, les

Anges qui sont en Paradis, ne laissét pas pour cela d'exalter la gloire de sa diuine Majesté, iour & nuit sans discontinuation ; C'est vn signe de sa toute-Puissance, de voir la terre seiche & aride, de la voir changer de face & deuenir verte lors qu'elle est arroulée de la pluye. Celuy qui fait reuiure les plantes est celuy qui fait viure & mourir toute chose, il est tout-Puissant. Ceux qui s'esloignent de nos commandemens ne se peuuent pas cacher de nous, celuy qui sera precipité dedans le feu d'Enfer sera-t'il mieux logé que celuy qui sera sauué au iour du Iugement ? faites ce que vous voudrez, vostre Seigneur voit toutes vos actions. Le chastieray ceux qui dementiront l'Alcoran, c'est vn liure precieux, il est approuué des escritures anciennes & modernes, il est enuoyé de la part du glorieux & misericordieux. On ne te dira autre chose, que ce qui a esté dit aux Prophetes qui t'ont precedé, ton Seigneur est misericordieux & iuste. Si nous eussions enuoyé l'Alcoran en langue Persane à vn Prophete Arabe de Nation les impies auroient dit que les misteres diuins ne sont pas bien expliquez ; Dis-leur. Il est la guide des fidelles, & le remede à leur ignorance ; les infidelles ont les oreilles bouchées, ils sont aueugles, & entendent comme ceux qui sont appellez de trop loing, certainement nous auons donné le liure & la loy à Moysse, les infidelles en ont douté, mais si ton Seigneur n'auoit pas dict qu'il differera leur punition iulques au iour du Iugement, il les auroit desia chasties en ce monde ; parce

qu'ils doutent de la verité. Qui bien fera bien trouuera, & le mal que l'homme fera sera contre luy, ton Seigneur ne fait point d'injustice à ses creatures, personne ne sçait le iour du iugement que luy, il ne sort point de fruit ny de fleurs de la terre, & la femme ne conçoit ny n'accouche que par la permission. Souuiens-toy du iour que ton Seigneur appellera les idolatres, & leur demandera où sont leurs Idoles; ils diront, Seigneur nous cognoissons ton vnité, personne d'entre nous n'adorera cy-apres ces faux Dieux; Ceux qui ont adoré vn seul Dieu, sont esloignez des idolatres, ils cognoissent que la punition de leurs pechez est infaillible. L'homme ne cesse iamais de demander des biens, & de s'affliger lors qu'il luy arriue du mal; si nous luy donnons du bien apres son affliction il dit qu'il l'a preueu, & ne pense pas à la venue du iour du iugement, s'il se cœuertit, ton Seigneur luy ouurira la porte du Paradis. Je ferai cognoistre aux impies leur impieté, & les chastieray tres-rigoureusement, lors que nous donnons des biens à l'homme, il suit son idolatrie & son peché, & lors qu'il est touché d'affliction il abonde en oraison. Dis leur, n'avez vous pas cognu que l'Alcoran procede de Dieu? neantmoins vous l'avez abiuré, qui est plus impie que celuy qui impugne la verité cognüe? Je leur feray voir mes miracles iusques aux extremités du Ciel & de la Terre, & en leurs personnes mesmes, afin qu'ils cognoissent la verité de l'Alcorá. Ne leur suffit il pas que ton Seigneur voit tout? neantmoins ils sont en

doute de la resurrection, & d'estre assemblez deuant luy pour estre iugez, certainement Dieu sçait tout.

*LE CHAPITRE DV CONSEIL,  
contenant cinquante-trois versets,  
escriit à la Meque.*

**A**V nom de Dieu clement & misericordieux. Dieu est Prudent, Sage, Magestueux, il entend tout, il est tout-Puissant, Dieu t'a enuoyé les mesmes inspirations qu'il a enuoyez à ceux qui t'ont precedé, il est tout-Puissant & Sage, tout ce qui est au Ciel & en la Terre est a luy, il est tout-Puissant & sçait tout, les Cieux s'ouurent par son commandement, les Anges exaltent sa gloire, & luy demandent pardon pour ceux qui sont en Terre, il est misericordieux, il voit ceux qui inuoquent les Idoles, il les cognoit tous, mais tu n'es pas leur tuteur; Nous t'auons inspiré l'Alcoran en langue Arabesque, pour prescher les habitans de la Meque, & ceux qui habitent a l'entour de cette ville, nous t'auons enuoyé pour leur prescher le iour du iugement, il n'y a point de doute qu'une partie des hommes sera sauuee, & que l'autre sera damnée, si Dieu eust voulu, il les auroit creés d'une mesme Religion, il donne sa grace à qui bon luy semble, & les infidelles seront priuez de secours, parce qu'ils ont demandé la